

國朝耆獻類徵初編卷二百八十五目錄

將帥二十五

補熙

宋愛

苗國琮

冶大雄

王郡

玉保

李繩武

董芳

陳鳴夏

齊大勇

豆斌


孫霽

達青阿

胡貴

塔勒瑪善

子伊柱



國朝耆獻類徵初編卷二百八十五

通奉大夫前署江西巡撫江西布政使司布政使湘陰李桓輯
將帥二十五

補熙

補熙滿洲鑲黃旗人姓佟佳氏父一等公鄂倫岱自有傳雍正元年補熙由廕生補理藩院員外郎二年調兵部四年改刑部七年授鑲白旗漢軍副都統九年署天津總兵十年奏言通州營教場順治年間圈爲旗地操練無定所難免妨農害稼請將遺陟還營又言向修天津城毀沿壕民房今工竣應仍構鋪面地租充營費並令兵丁築室四隅於十分內畱給二分令配軍搭廬以居一例

免租均從之尋署宣化鎮總兵十一年襲祖佟國綱騎都尉世職奏張家獨石及洗馬林堡三口准種地民出入餘悉禁邊民圖近偷越弁兵因賄放嗣後凡報州縣給口票驗無違禁物俱准出入無票解宣化大同貯礮多請撥張家獨石二處各六具紫溝龍門二處各四具以資操演諸汛視衝僻定兵多寡以重巡守十二年疏言逃兵有竊帶餉馬者律未載明請敕部加重議罪家口移縣嚴追賠繳直隸營制兵餉從補日始惟宣化至下月初一日起支應畫一生息銀給岳父母妻子外同居兄弟槩停給以杜冒濫俱下部議行九月擢江南提督十三年疏陳營汛事宜一福山至吳淞川沙俱屬水師中閒劉河陸路營勢不聯絡請撥崇明

鎮沙船四交劉河營派千總外委輪班會哨一崇明狼山二鎮水
師統領二月出巡前往十月巡竣後令吳淞川沙黃浦劉河等營
隨崇鎮會操福山營隨狼鎮會操俾知練習一柘林之濠缺汛南
匯之新塋汛青村之青村港汛俱沿海要地應各增設千總駐巡
原設把總畱營操練一海口載貨小船漁戶網船請照大船刻號
編船戶姓名無者不許出口 從之乾隆元年授漕運總督奏漕
標左營副將右營遊擊夏秋閒例出趲空運營中乏員訓練請增
設中營副將轄都司一千總二把總及外委千總各四左營改設
遊擊轄守備千總各一把總三外委千總四右營弁兵如左數將
原額新舊兵分撥無容增餉又言向例漕船未滿十年例損朽者


准雇民船一次均給回空限單旗丁因費多聽民船回空自行攬載至淮別雇應點沿途催查兵役知船數不符需索滋累請交糧後但給旗丁隨身限單到次繳驗所雇船免給至白糧船未滿五年限丁疲船朽者卽減運另選均得 旨允行時山東河南截漕船應扣給錢糧未定章程 敕部漕議尋議奏本折色月糧爲安家贍食三修銀爲修艚船隻應全支半折色行糧計程支運耗銀米原以資運折耗其銀亦計程支其米到截畱州縣收逾半月限者計月支山東任城幫無贍運屯田其贍運銀全支河南盤剝銀因臨清剝淺設已抵者全支未抵者按程支疏入著爲例二年六月 命會勘東省運河九月疏請定閘水以四尺爲準視舊例深

五尺省剝淺費下部議行十一月丁憂回京三年補鑲白旗蒙古都統五年二月調正藍旗滿洲都統七月授綏遠城建威將軍十月疏稱旗員不諳開墾事宜請令雁平道協理又同巡撫喀爾吉善奏於歸化城增設巡道於滿洲蒙古內補授俱從之六年疏言綏遠城兵額多祇佐領防禦驍騎校等各三十五員不敷董率請將右衛滿洲正紅鑲紅鑲白正藍鑲藍五旗撥佐領等各一歸綏遠下五旗又言托克托城內倉儲數萬防守人寡令歸化城都統派兵輪守又言殺虎口距綏遠二百餘里應設二十六汛內新店子五松禿路沙兒沁大黑河設把總各一二十家子爲適中地設都司並中軍千總各一管餉轄各汛均於鎮標殺虎口協標內

撥兵往駐其甯武八角營都司得勝路千總新平虎威水谷樓溝
四把總汛僻員冗俱移撥新設各汛再城東南係察哈爾四旗兵
駐劄餘係土默特蒙古地遇失事卽責該地官兵無許推諉俱議
行八年暫兼管山西提督事九年奏請綏遠民願以米穀豆抵交
墾戶借項及應徵草折銀者聽交納免加耗俾積欠早完從之
十一年疏請設滿漢繙譯官學於綏遠城選在京八旗呈誤人員
咨充教習有成定年升轉公費照前蒙古學例給予部議教習於
右衛八旗舉貢生監並罷閒散旗員內考補餘如所請十四年四
月疏言右衛滿洲上三旗及蒙古八旗官多兵少裁佐領防禦驍
騎校各一裁員俟綏遠右衛二城缺坐補兵均派各旗轄領催俟

缺出汰除漢軍上四旗官少兵多每旗應增佐領防禦驍騎校各
一各撥原領催二在新佐領下兵亦均派轄增缺令漢軍見任官
暫兼俟滿洲蒙古裁缺後將漢軍人員揀發不至多糜俸餉部議
准行八月病 命太醫院官往視十月 諭來京調養十八年卒
賜祭葬諡溫僖長子嗣睿襲世職

右 國史館本傳



宋愛

宋愛甘肅靖遠人父可進官四川提督自有傳愛雍正元年武進士授三等侍衛二年可進署涼州鎮總兵隨奮威將軍岳鍾琪征勦準噶爾正月 命愛至西甯軍前省親三月大兵進勦桌子山碁子山諸番愛隨可進奮戰有功七月回京十二月河南河北鎮總兵紀成斌奏請將宋愛補授河南開封營都司 上允成斌所請尋成斌奏新補都司宋愛到臣衙門宣傳 聖旨臣跪聽之下不勝惶悚臣前以開封營都司駐紮省會重地且懸缺無人因思去年進勦桌子山親見宋愛奮不顧身極有膽氣且代宋可進分派營務頗有才幹知其必能料理地方故敢冒昧陳請將宋愛補

授實爲地方起見並無聽人分付卽宋可進亦不過同在軍前認識素無交情疏入 諭曰朕原不過揣度之詞並非有所見聞而云然也但近年以來年羹堯操大將軍之權人多畏服若爾等蔑視國恩而瞻顧私誼則甚有乖朕保全功臣之意今覽所奏實爲地方起見一無別故朕深嘉賞七年升山東卽墨營參將八年調山西汾州營參將尋升浙江紹興協副將九年 命署河南南陽鎮總兵十年五月署湖廣永州鎮總兵十月署直隸天津鎮總兵十三年署正定鎮總兵乾隆元年回紹興協副將任五年署定海鎮總兵六年升湖北襄陽鎮總兵七年調貴州安籠鎮總兵八年奏永豐州地方緝獲李梅案內逆匪黃三韋阿三羅阿章羅隴四

名搜出悖逆符紙並續獲之王祖先等卽訊供咨報提督查覈復將供出未獲各犯於本省上緊嚴緝其在滇粵各省者亦卽飛咨各督撫提鎮嚴飭查拏得 旨斷不可存此疆彼界之心一切查拏惟應上緊以淨根株十年貴州總督張廣泗奏前因古州鎮總兵官崔傑疏縱弁兵業經奏參惟是古州係新闢苗疆必需老成練達鎮臣調補彈壓查黔省各鎮中惟安籠鎮臣宋愛詳慎周密統率將備尤極嚴明且年力正壯請調補古州鎮總兵得 旨此奏卽有旨諭部但宋愛爲人恐在好事喜功一邊卿可時常畱心策勵之彼若能去其結習固是一好鎮材也十三年五月丁母憂十月 命署鎮遠鎮總兵仍暫署古州鎮事務十四年奏言向例

武職陣亡自提督至守備皆有加贈惟千總把總並無加贈竊惟
官有崇卑殉難則一請將千總把總陣亡者照守備例加贈又陣
亡之提督以下守備以上悉照原官加贈若有銜大於缺者請照
銜加贈疏入下大學士會部議行十五年服闋實授古州鎮總兵
十六年有赴滇過普人鈔錄逆詞經提塘吳士周稟呈宋愛卽轉
稟雲貴總督顧色究辦 上嘉其知大義十八年擢貴州提督尋
奏前提督丁士傑稱古州等處苗人有因公役使不從恐漸成驕
抗奉 諭文武各員隨宜彈壓竊臣兩守封疆加意拊循苗情俱
屬安帖至古州苗民於應備夫役一呼卽至亦未見有遲誤所屬
新疆距古州稍遠密加訪察並無抗違之處苗性難馴惟在地方

官善於約束平時不煩苛滋擾有事不姑息養奸務於懷德之中
使知畏法此實綏輯新疆大關鍵得 旨丁士傑此奏不無見長
之意今以其多事調來京候旨汝宜仍前勉力卽新疆亦不時查
察可也十九年十月碩色劾愛報斃營馬逾額不卽買補又鎮遠
鎮總兵吳三傑病故違例攤派銀兩是月愛卒於官 諭曰碩色
參劾宋愛邀譽沽名廢弛馬政各情由本應交部革職來京候旨
但據定長同日奏到宋愛已經病故該督所參各款著無庸追究
十二月 諭曰前碩色參劾宋愛摺內有因總兵吳三傑病故該
提督於各營斂分致奠一條朕以吳三傑業經病故旅櫬無力旋
歸同事捐資協助尙係人情所有與見任上官斂派屬員干犯禁

令者不同列入參款不無過當是以未加深究今據定長奏稱黔地邊遠凡武職事故通省各營均攤資助自康熙年間卽有成例俱由藩司動借公項扣餉歸款歷來有案可稽近年副將以下等官事故督臣俱經批准捐助是此事在該省行之已非一日又不自宋愛始矣著傳詢碩色從前各省似此病故者該督有無批准捐助何以獨將此事參劾緣由據實覆奏尋奏黔省武職捐助病故人員並非部定成例原係本省公議舉行前據布政司詳請臣俱批准其提督身爲通省武職大員似不應勒派屬員今提督宋愛意欲資助病故總兵吳三傑家屬並不與臣咨商竟行攤派銀一千餘兩違例任性是以不敢徇隱得旨此事實不可究也